


'I Love Aruba' di rumannan Lejuez ta demostra kico hendenan creativo cu Aruba na pecho, por haci pa nan pais

Omar Steve: "Nos kier crea algo pa nos pais, pa laga atras ora nos no tey mas"



ORANJESTAD (AAN): Mirando e exito grandi cu I Love Aruba ta cosechando, unda cu entre otro tur dia mas y mas turista ta saca potret dilanti di Bestuurskantoor y ta pone esaki riba internet, promoviendo asina nos isla, DIARIO a entrevista Omar Steve Lejuez, kende hunto cu su ruman Chris "Bonky" Lejuez jr. ta esunnan cu a cuminsa cu e concepto di I

Love Aruba.

DIARIO a puntra Omar Steve con nan a cuminsa cu henter e idea tras di I Love Aruba.

El a splica cu nan tabata tin un buki den cual companianan ta pone aviso, cu tabata yama Aruba guide y nan a cuminsa pensa caba riba e potencial cu e nomber 'I Love Aruba' lo por tin.

Nan a busca e doño di e

nomber I Love Aruba y esaki tabata Dick Miller, kende tabata tin e Dick Miller Show na radio.

E rumannan Lejuez a acerke y a compra e nomber ilove-aruba.com for di dje.

Despues nan a dicidi di cambia e nomber di nan buki pa 'I Love Aruba'.

"Nos tabata sa semper si unda nos tabata hibando e storia di I Love Aruba, pasobra I Love Aruba ta hopi mas cu simplemente un buki of 'merchandise'".

Esaki segun Omar Steve, kende a sigui bisa cu na dado momento a bin e caso di desaparicion di Natalee Holloway y Aruba a cuminsa haya basta publicidad negativo, unda cu tabata tin hende cu kier a caba cu Aruba.

Arubianonan tabata bay na television y bisa cu Aruba ta un bon lugar, pero si bo wak bon esey so no tabata suficiente pa convence mayoria Mericano.

E rumannan Lejuez a pensa pa bin cu un asina yama 'counterattack'.

"Ningun hende a wak e balor di kico un turista tin, una vez cu e bin Aruba.

"Nos ta propaganda pa bin Aruba y nos a kere cu ora nan bay for di Aruba nos ta cla cu nan".

"Nos ta kere cu nos a haci asina un bon job den turismo, cu un dia nan ta bolbe".

"Sinembargo eingelijk nan tur por hiba algo pa carga e nomber di Aruba y papia bon di Aruba y asina nos a papia

cu tur hotel pa nan participa, unda cu cada turista tabata haya un t-shirt di I Love Aruba for di e hotel comp souvenir, despues cu e hotel a compra e t-shirtnan for di I Love Aruba".

Esaki segun Omar Steve, kende a sigui bisa cu asina a traha di cada turista un 'Goodwill Ambassador'.

"Hopefully nan ta bisti e t-shirt den nan bario y asina entre otro nan por bisa nan bisiña: "Aruba was the best and the greatest", segun Lejuez.

DIARIO a puntre si el a spera cu e reaccion positivo lo tabata asina grandi, mirando e exito di I Love Aruba.

Omar Steve a bisa cu locual ta sosode ta hopi impresionante.

El a bisa cu hopi hende ta wak e parti fisico di I Love Aruba, cu bo por mishi cune, pero e ta wak e como un 'facebook tool'.

"Pa nos e ta un internet tool y nos ta purba crea mas Kodak moments posibel, pero awendia ningun potret ta bay mas den album, sino online".

"E online ey ta e balor cu nos kier a dune y nos ta super orguyoso riba nos mes, pero nos tabata spera cu algo asina lo tabata bay pasa", segun Omar Steve.

El a splica cu tin cosnan cu

nan mes ta inventa manera e t-shirts, pero varios aña pasa el a wak e 'I Amsterdam' sign na Amsterdam y el a wak kico e sign ey a haci na Amsterdam.

El a pensa cu si e traha esaki pa Aruba, esaki lo bira algo hopi impactante y esey a logra.

"Super e cos aki ta y mi ta hopi contento".

"Diariamente nos ta haya compliment y esey ta trece asina hopi positivismo den henter e concepto aki", segun Omar Steve.

Ora cu DIARIO a puntre kico mas ta na caminda, el a dal un sonrisa grandi y el a bisa: "hopi pronto lo bo haya sa esey y nos nunca lo stop, nos tin un passion grandi pa e cos aki".

"E no ta algo di placa, sino nos kier crea algo, pa asina ora nos no tey mas, nos a haci algo pa nos pais".

Esaki segun Omar Steve, kende a sigui bisa cu nan ta pata pata di ambicion.

El a bisa tambe cu si bo wak bon, no ta importa ken bin cu cua expresion of logo di Aruba, basta e ta algo positivo y nomber di Aruba ta worde teni na haltu y ta worde promovi mundialmente, pasobra e meta semper ta pa Aruba ta un lugar unda tur hende lo kier bay.